

四庫全書

集部

欽定四庫全書

臞軒集卷十一

宋 王邁 撰

墓誌銘

莆陽方梅叔墓誌銘

莆品丁之家方為著姓端人紳士層見疊出有位公卿
立修名矯節於朝者有任牧伯連帥揚仁風義槩於方
外者餘挾一能一藝多奮拔於鄉於學於天子之庭故
莆人有無方不成榜之謠獨梅叔君懷瑾握瑜足跡半

湖海而天無老眼命壓人頭偃蹇不得志賈恨下泉唐
人所謂直教桂子落墳上生得一枝魂始消者非君之
謂歟君少受知於叔祖少卿公銓仕衡陽日君以弟子
為賓客自書札外未嘗毫髮預他事少卿去衡君以衡
人士多執經授業於其門者不忍捨其師去相率哀金
買宅一區以家之余庚辰辛巳入潭幕於衡為近一時
臺府如俞公徵趙公善踐孫公得輿李公東皆持節與
梅叔交爭館粲之余每欲沿檄游石鼓與君淪泉煮茗

相叩擊不能得君亦欲至潭訪余而諸公之在衡者恐其為有力者奪去竟不與行壬午春余以憂歸聲問不相接者十有八年己亥夏有以衰經造吾門視其刺不知為何來使介者詰之知其為梅叔之子也亟出迎之坐定且泣且言曰槩不夫先君家衡三十六年壬辰歸故里葺先廬為終焉計不幸戊戌之閏月下世矣葬且有日槩哀先志不就大懼歲月久且沉泯無取證於來世求夫子之文刻墓石以傳則先君為不朽

矣於是系其譜而銘之方氏自光之固始來十有四代
祖金紫公庭範宰長樂治產於莆遂為莆人君大父有
為父冲鄉潛德弗耀毋林氏君生而岐嶷家貧無書借
於隣族一目數行俱下終身不遺忘長為諸公要人客
所為文操筆立就世有業進士不習為外學至目之為
屠龍無用之技亦有專攻詩詞駢儷而不屑作原夫輩
語以是為童子雕蟲壯夫恥之者惟梅叔兼其所長故
自少至老挾耿耿者以游四方而歲得子弟束脩及青

雲貴人餽遺以自肥其遜家衡日買姬妾數十人吹笙
鼓琴歌舞以娛賓客感時撫物念家懷土酒酣作樂府
付歌者清婉可愛暨返故居出所貯蓄市田園以供粢
盛得眠中人之產且過之每語子斐曰吾辭家出游時
無半菽之疇無卓錫之地今有田若干屋若干非有俸
祿以置之田吾筆耕之田屋吾書中之屋也雖然吾豈
為吾身及汝曹溫飽計哉吾少讀書有志當世謂得百
里為之宰必求如卓密令魯中牟得千里為之牧必求

如田仁會元結輩今無能以尺寸及物豈吾志不如古
人吾才不及今人耶是有命焉吾固安之矣力學成吾
志汝曹勉之斐誦其言以告余為愀然嘆曰士所植立
係其志所逢合係其時今竊科進身有貪婪苟賤者官
日大流毒於民日深橐金與屋數世不肖子孫用不盡
乃使志士仁人以濟人利物為心不得施設萬一分使
之賣文為活僅得數畝田數椽屋以麻壽其後嗣則自
詭以為詩書之末效至於身不得行其志且以望其子

若孫焉吁是可悲也已君諱應龍以字行於世晚以梅
窓居士自命享年六十七娶吳繼趙先卒男一人即吾
友棐也為吾族乙未特魁之姪壻孫四曰炳曰煥曰煒
曰熿女二長適營道宰商景春次適進士陳伯順早世
棐以己亥九月六日壬申領諸孫奉君柩葬於興化縣
廣業里牛岡之竹峰昔君在衡日謁術者得卦兆有牛
岡尋吉穴歸葬竹峰前之句今所葬之地之名與兆協
豈天閔神藏以厚吉人他日將有興者歟銘曰族望兮

堂堂聲名兮泯泯走四方兮皇皇不貴不壽兮返故鄉
從龜從筮兮歸吉藏不在其身在於其子孫兮吾為之
責報於蒼蒼

祭文

祭林通甫先生墓文

嗚呼湖海之英如公者幾儒冠誤人公竟止此談經講
道三傳蹄筌人謂先生為盧玉川具眼達觀齊一生死
人謂先生為蒙莊子少而好游足跡四方人謂先生為

馬子長古貌古心寄興幽雅人謂先生為孟東野酒酣
行樂縱筆歌行人謂先生為石曼卿知壽不遐晚不納
室人謂先生為种明逸其位甚卑而道則尊其身云亡
而德則存我輩游從為日既久天喪斯文哲人不壽撫
棺而慟一酌杼哀魂如可招盍歸乎來東山之藏故居
之右君子之終沒而不朽

祭海陽縣尉林磻廩先生文

先生之學涵古如今先生之文夏玉鏘金三十餘年授

業青衿晚得一第僅償苦心初筮下僚上官刮眼來事
可為仕途履坦人亦有言黃花香晚天假之齡如是其
短嗚呼茫茫彼蒼於物有情亨者使泰枯者使榮獨於
先生嗇而不贏前輩彫喪空餘典刑吾黨向來受教席
下一奠柩前有淚盈把鄉先生亡祭之於社誰倡義風
興起來者

祭親友林涇清叔文

嗚呼人誰不死子死於溺九月初旬余聞之於道塗未

敢以為的也未兩日而言之者益譁往往以為實也
余欲問訊於子家恐子之親驚且惕也又數日始知
子家招魂於水濱余然後撫膺而痛泣也自是以來
余食不能以下咽寢不能以終夕也一夕夢子卧床
簣之間余有言而子默默也既覺則月照屋梁恍然
如見子之顏色也嗚呼子其竟止於斯耶子於余為
世姻而交情則金石也余初聚徒於龍池子之年纔
二十一也朋友五十餘人子獨為吾門之巨擘也與

余累年為文字游子之學日進於一日也余既登第於太常則冀子聯翩於桂籍也去秋不利於貢闈則冀子策勲於環壁也中夏俟捷音不至則冀子歸之亟也未夏得中都書謂子有厭厭之疾也初秋寄書於子勸子以肩輿而歸恐病後之無力也不謂子舍陸而川遽有風濤之厄也嗚呼文人才士之薄命如子者蓋不一也賈誼止於二十三而李賀則二十七也今子年三十一而死亦未足為子惜也獨以死而不得正

所以不能不為子戚戚也然自古有如子之不幸者皆不容以致詰也屈原自沈於汨羅而李白自投於采石也子豈二子之流故與之相從於水仙之室也嗚呼才者鬼神之所嫉也壽者造化之所嗇也使子無如是之才則亦不為功名役也使子不困於功名之行則必亦令終於寢室也然自達道者觀之則又等生死於一夢付去來於一息也莊周之徒所以不有其身謂不免乎烏鳶螻蟻之所食也蓋一點英靈之氣凡所至皆可求

其魂魄惟是可傷可念者子有雙親望子之成名於捧
檄也子有少妻望子之和鳴於琴瑟也子何忍使老者
之虛其望使少者之喪其匹也余與朋友所期待於子
者何如又何忍使數月間而幽明之永隔也一慟生芻
之前雖禿干毫不足以寫悲傷之臆也嗚呼哀哉子每
能飲其量如鯨今酌一盃子不能傾子其知此情耶其
不知此情耶哀哉

祭陳復齋寺丞文

嗚呼萬類汙汙隨波俱沒金石精堅劫火不滅復齋先生
生千年人物忠孝持身聖賢合轍嗟世家之無人多自
顏其閥閱惟先生大正獻之家聲有呂范二公之風骨
嘆道學之無傳幾不絕其如髮惟先生得文公之正宗
探伊洛諸賢之理窟方壯歲之立朝抱嶙峋之直節丙
子一疏之盡言措紳相顧而吐舌殿豸為之失威社鼠
為之塞穴既出把於州麾視民瘼之如飢渴南康延平
之政成幾萬生靈之全活廬阜避其孤高劔水遜其清

潔速寧考之上僊泣遺弓之清血誓墓之志一堅栗里
之歸始決蘭無人而自芳松到天而不屈蓋其語也非
賣直以沽名其默也非甘心於囊括其出也直有救世
之赤誠其處也豈但為保身之明哲根之以內心之昭
融加之以學問之親切由本領之純全故功用之宏闊
將宇宙之是扶何梁木之遽折豈蒼生之命果窮
而斯文之脉將絕然生榮而死哀且全歸而無缺
有東閣之郎君可繼承於風烈有西山之美人可

垂銘於墓碣然則先生之所存於世者甚長豈比榮華
富貴之消歇某也以里巷之諸生荷知憐於方拙坐明
道之春風揖濂溪之霽月歸自長沙也先生為之書庶
仁公勤之箴及官中都也先生贈之以捨生取義之說
尚擬嗣歲之春長在樞衣之列何哲人之云亡攪悲腸
之悵結寄奠一觥臨文哽噎嗚呼先生幽明永訣

諸門生祭真大參西山先生文

時朝士之為門人者十有七人天生先生為宗社計進

退存亡關係斯世海內一詞期以經濟道之將行命有所制窮理致用講學有宗時雨之教春風之容偽者獻誠慢者致恭人謂先生為程淳公方寸不欺守道自信曰思無邪曰無不敬口無過言身無玷行人謂先生為馬文正淳公位卑道立於獨人惜其亡天下無福文正登庸遠夷心服未久而薨都人巷哭先生之道遠紹於程立朝補外俊偉光明先生之位雖不及馬兒童走卒無不知者權姦見忌退處八年著書西山其樂怡然天

日清明甫及聞政筋力未衰乃嬰病痰丐歸者屢僅界
內祠丙吉病愈上日望之中外門人孰不致禱夫何彼
蒼遽奪此老述作萬卷珍重璠璣最留意者行義一書
謂此書成死可無憾自今觀之殆成語讖風濤洶涌思
濟洪流巨楫一折淪胥是憂自有都堂凡幾輔弼如先
生者不一秉筆易箒之際神氣溶溶曰予此心秋月當
空騎鯨而仙先生何欠國病民瘼孰鍼孰砭諸生疇昔
樂在樞趨忍於此日而真生留薄真陳情有淚盈掬已

矣先生百身莫贖

又

先生受清和之異稟集理義之大醇氣之塞乎天地者
志為之帥行之通乎神明者敬為之源凡出處之大節
為搢紳之所尊維先皇帝賞其忠勤將大用而未竟留
以遺於後昆維明天子潛躍有聞亟召還於長沙趨入
覲於紫宸陳綱常以扶世教之墜辯忠邪以燭時人之
昏使其言之果行可再造乎乾坤其如月偃林甫之堂

風起元規之塵虎守關而耽耽犬吠雪而狺狺先生乃
傲視乎軒冕高蹈乎邱園謂不見之行事即斯文而策
勲登堂而受業者誦誦之學子趨庭而問禮者繩繩之
子孫窮百聖位育之道探千古理亂之原著大學之行
義可肩孟而跨荀曰如有用我者吾將獻之吾君天佑
我宋端平改元權姦不誅而自斃羣儉鼠伏而兔奔先
生乃辭粵山之泉石整造闕之申轅溫公起於洛人謂
之游龍行雨范公起於蜀人謂之鳴鳳出羣去二公百

餘載人於先生亦云至則抱所著之一書侍翠幄而討論動重瞳之注視啓玉齒之咨詢位文昌之清華司貢闈之選掄疲神考校廢寢忘殮夜得一士旦告蒼旻暨撒棘而造榜愆調理於寒溫下天使之拊問示睿眷之頻蕃就登延於政府欲旋畀之國均奈大數之有盡莫竟展乎經綸上咨惜以輟朝痛元老之不存敕季弟以護寔加賻禮而異倫錫以易名之典慰其如在之魂曰委質立朝無如公之忠曰垂世立教無如公之文合二

者以為謚播青史之遺芬嗚呼哀哉惟先生之用
舍係吾道之泰屯惟先生之存亡闕吾民之戚欣
嗟弊壞之已極當汙俗之胥淪進賢而莫行其志
去惡而不拔其根橘或化而為枳猶終得而揜薰神龍
去而羣虺肆威鳳逝而衆鳥喧顧巨楫之已折傷波流
之汙汙嗚呼哀哉先生所居化熏甌閩頃羣盜之為梗
悉去晉而奔秦慘輜車之東歸哭道周之縞巾惹蒿悽
愴之戚家如喪於所親先生所治易地同仁泉民愛之

尤深如河內之愛恂聞郵傳之訃告慟於祠者兼旬秋
菊寒泉之荐歲彌久而彌新昔傳仙峯之絕頂有士修
道而煉真丹甫成而倏化為先生之前身僕嘗於暇日
以有問先生荅以不語怪神但言其使江東之日夢班
於紫微之垣又言天上之為神仙皆人間之孝子忠臣
今即斯言而深省當去而為上界官府之星辰某也猥
以狂斐久遊師門受知獲愛誨語諄諄鑄我以轉砂之
爐斲我以運風之斤為訂頑而斲愚為祛蔽而通堙曰

英氣多和氣少者憤啓之訓曰一生短千載長者有味
之言自師資之既往悵莫報乎大恩追遺教以佩服誓
九殞而弗諉比閏秋之奏對吐肝胆之輪囷內言欺君
罔上之百辟外言飛揚跋扈之統軍近言宦寺有捷出
之徑遠言濟邸有未雪之冤荷聖度之容納初不怒其
逆鱗獨驕帥之肆辯結讒夫之搖唇至班行之諂子亦
助之而澗翻果白簡之見及曾余舌之莫捫幸鶴山之
夫子獨愛直而賞珍空船載乎明月滿袖惹乎香芸入

南浦之迤邐，睽西山之嶙峋，思立門之夜雪，念侍坐之
陽春，恍昨遊其如夢，灑涕泗之繽紛，嗚呼哀哉！共極堂
高，今夜不晨，招鶴亭深，今愁暮雲，六經無師，今宇宙無
人，惟有珠林之麓，兮長餘春木之芑，生芻一束，心香三
熏，先生如生，歆此一樽，其必曰是為吾學而不吾叛者，
宜登拜於斯墳。

祭趙東巖文

嗚呼東巖在閩南塘在浙皆工文章皆負氣節塘蘭方

枯巖松又折以官職言有優有劣以名節言孰全孰缺
與其致身於從班以逢君為容悅孰若全終身之令名
無可恨之毫髮比天下士均惜二公之亡尤為東巖悲
傷而痛切昔寶慶之權門紛邪朋之附熱公纔綴於班
行遽抽身而勇決逮端平之初元來衆正之英轍諸公
挽之而留中公乃掉頭而不屑方其陟峨嵎而游錦城
歷秦望而探禹穴襲浣花之芳塵臨蘭亭之遺帖及其
道林嶽麓之倘徉石鼓洞庭之登涉紉纒乎沅芷湘蘭

搜采乎顏碑柳碣以昌吾詩之精神以寫吾琴之幽絕
不汙度亮之纖塵不染曹蜍之點沫其宰安溪也人愛
之如魯恭其守惠陽也人歌之如元結董睢邨之宗盟
屬舶臺之兼攝視琛貨如涕淡化不清作玉雪加以真
西山之高與夫李竹湖之潔三清萃於一時賢者之師
而不屑者之怛持兩節於重湖撫遐氓如飢渴當狎至
之羽書督洪流之戰筏不加賦以擾民竟如期而津發
處急遽以恬閑轉震驚而妥帖凡飲德而茹仁猶膏枯

而醒暘果最課之上聞亟賜環而覲闕公一笑而來歸
曰宵征之宜歇散策乎荷屋葯房銜盃乎杉風蘿月心
羨高舉之鸞鳳耳厭妖鳴之鴟鵂指箕尾之晝升愴長
庚之夜滅嗚呼哀哉人物彫萎世途杌隉命代之儒爽
邦之摛聚於本朝猶在目睫二三年來如風掃葉仍於
斯時奪此人傑更生卒而宗國之憂孰分李晟亡而萬
人之命誰活以位則不至公卿以年則不登耄耄獨留
東巖之巍峩長並三山之岌嶮某也晚登門墻辱憐樸

拙文席一違歲筒四閱忽訃告之流傳增憂心之忡悵
覽謫仙之詩而涕零撫中散之琴而聲咽埋玉之墳向
山之埵白馬素車詣堂膏秣秋菊寒泉宜薦芳列先緘
詞以抒情叙榮哀之本末冀精爽之來歆悵幽明之永
訣

祭魏鶴山先生文

惟國家盛時之人才稟山川清淑之間氣文章則眉山
之父子道學則伊川之昆季更南渡之百年邈徽稱而

誰嗣鶴山先生以英偉之姿抱遠大之器文追正始之
音學探聖賢之秘權史當朝以儒為戲先生輩人不得
行志當寶慶之初元抗綱常之宏議虎守闕而怒號犬
見日而羣吠斥忠質於渠陽快女嬃之怨詈誼也當此
賦鵬以悲鳴原也當此沉湘而憔悴先生處之泰然曰
吾有命有義履畏境如康莊茹苦荼如甘薺獨盡力於
斯文將垂光於來世於易則探賾鉤深於禮則訂訛證
偽於詩則陶寫襟靈於字則平章篆隸凡筆端之遊嬉

指理窟而超詣積八年之深功績程蘇之位置使一朝之大用當盡抒於經濟迨夫天斃權姦朝登儒揆初年而西山自閩來次年而先生自蜀至洪蔣諸賢後先征彙遂使端平之初及見元祐之懿奈西山之一類如杲日之西墜先生哭之盡哀人士聞之興喟未幾而蔣終於家又未幾而洪薨於位立東門者一人凜靈光之標致以政地之重臣為督府之元帥何異乎嫉真鄉而使之為說李之行惡彥國而使之為出疆之使未視師而

賊膽寒將策勛而同列忌俄異論之橫生悵初心之莫
遂蜀無家之可歸奉叢祠之若寄及帥閩之命攸猶物
情之少慰司封駁者何人犯清議而不媿使此身之猶
存尚行道之可冀何殞星之告妖乃脩然而蟬蛻嗚呼
哀哉天生偉人關繫匪細出處則關民生之戚休存亡
則係吾道之興廢宜錫之期頤之年留以為宗社之衛
至於姦臣弄權貪夫敗類宜凶於而身而家母得以為
鬼為魅彼蒼者天胡然不惠惡者永年善者降厲望之

周堪歿而孔光賜杖於建平之間元城瑩中卒而蔡京
白首於靖康之際鐘鳴漏盡者冥行不休而元夫巨人
乃淪亡而相繼嗚呼哀哉國步間闕民生彫弊京裏邱
墟江淮鼎沸外有側目伺隙之儉壬內有搖舌肆讒之
婦寺此何時而梁木摧此何景而蛟龍迹是殆晉人所
謂秋高搖落之時使人眩然而出涕某晚登門牆辱窺
小異雖名位之不侔偶襟期之胥契讀奏篇之瞽言曰
差強乎人意屬霜簡之見排紛羣目之疾視先生白之

榻前至色莊而言毅謂去一微臣不足憐恐天下自此
以為諱旋開悟於上心得免投之荒裔贈之以朝陽鳴
鳳之繡圖申之以綵筆飛鸞之大字至今序引之珍箴
熒然有光於巾笥先生於僕非納交僕於先生非借勢
或者下石之未休猶謂托名流而附麗自漳濱而斥還
擬墓前而自誓抱直道以不渝鞭古心而愈勵聞訃告
於郵傳集百憂於肝肺蓋為世道之隱憂非特一身之
私計假精廬以招魂陳生翽而設祭諒英爽之周遊如

源泉之在地隨感召而必通儻下歆乎一醉人之云亡
邦國殄瘁悠悠我思明發不寐

祭丁元輝給事文

嗚呼人之才品有崇有庫遭時履運有險有夷自寶慶
而紹定紛邪黨之猖披毀蘭茝而不佩采蕭艾以充幃
公乃在下寮而不愠見合光塵而不詭隨此一時也人
不得以汙元規之塵而見譏暨端平之改瑟為善類之
休期鳳鳴陽而噦噦麟瑞世而師師公乃居風憲之緊

地進伏蒲之良規此一時也人不得以負望之之薦而見疑至嘉熙之變局正黨論之交馳摸床稜者無可無否騎門限者半黠半癡公乃吮筆乎螭陛演綸乎鰲扉司銀臺之封駁班文石之論思此一時也人又不得以牛李之黨而目之嗚呼自紹定而始進已發軔乎通達在端平則合端平在嘉熙則合嘉熙自古賢者之出處不與時枘鑿者幾希設於時而諧合又於道而支離公則內不失乎已外不違乎時出與物接侃侃愉怡入守

官箴惴惴矜持享厚祿而弗恤諸孫之無褐典衡文而不欲邑子之瞻依於所厚者寧薄不以公而減私入仕四十年而不掛吏議立朝十餘載而不蹈危機上有以結九重之眷下有以締三相之知將進登於四近庶展究其設施方其後福之猶熾胡造物者之不憇遺嗚呼年來人物日覺彫萎有出處不能為朝廷之輕重有存亡不繫世道之安危有毀譽出於勢利之遷就有是非不根於人心之秉彛如公之不大用亦門生故吏之所

共悲僕昔同朝纔及半朞以罪去國升潛異歧聞訃告
而感悼迎素車而差池生芻一束寓哀平時嗚呼公乎
竟止於斯

祭鄭都承子敬文

丁酉

嗚呼哀哉仲春初泮方得公書情文溢紙細字渠渠謂
因感冷藥裘是需我每羨公精於調理紅顏怡怡高談
亶亶縱有微疴亦偶然爾一日行路忽有異傳我不敢
信心極懸懸徐詰其寔公果溘然嗚呼哀哉公生相門

寔則儒素涵如羣書練習典故不但多聞且通世
務太和試邑藹有休稱入遷院轄再轉為丞顯官
要職跬步可登維時權姦其門可炙公心恥之抗
章丐出吾官寧卑吾道不屈高牙大纛作牧廬陵民肌
春暖吏膽冰凝不畏強禦讒言朋興浩然來歸一邱一
壑與陳復齋追隨最樂罔俾耆英專美於洛十有七載
冰山乃傾遙以郎台承旨樞庭一語不合拂袖而行有
詔起家卑以漳守政店民疵是圖是究千里詠歌二天

宏覆廼者望日出勸農耕歸坐鈴閣寢已三更曾謂頃
刻乃隔死生嗚呼哀哉賢者存亡有關天運比年以來
德星屢殞我欲問天天不可問復齋家木鬱乎蒼煙建
昌仙去閭里淒然又弱一個人何望焉嗚呼官至元士
官不為小年踰耳順年不為夭所可恨者積豐施眇郡
失良牧朝失蓋臣子失名父里失賢人知與不知愴然
傷神某也辱知豈非一日迎拜素車有淚盈臆卮酒寫
哀公其來格嗚呼哀哉

又

嗚呼嘉定之間朝登謬宰公閑於家十有七載端
平儒相收召諸賢公得起廢一歲數遷是時朝廷
號小元祐公在都司賢業未究三陽方長羣陰伏
焉陣脚一動公去翩然出守清漳未幾奏最胡為
元身中宵蟬蛻年來宇宙白晝晦冥天荒地老雨慳風
盲元夫鉅人乃不得壽俗物茫茫龐眉皓首靖康之際
海內流離龜山和靖皆身見之孰若元城與了翁老騎

鯨而仙不見此禍公今往矣鈞天其游千年芳魄聊寄
此邱子孫能賢滿種松檟吉人之歲過者下馬

祭連袂謝克恭欽仲文

嗚呼人道亦大矣或托好於朋友或締契於姻婭始情
分之雖密終交道之難全間有全之於其人而固虧之
於其天此吾今日所以為欽仲而一慟蓋不勝其愴然
也始吾與欽仲為友道同氣合者垂二十年散則無一
月而不遣僕聚則無一日而不共筵我嘗砭君之過君

亦繩我之愆凡書素之所寄皆中心之所宣如淵明親
戚情話之悅如子美人生襟袂之連及余自長沙而告
至君嘗言我於堊室之偏秉燭相對而如夢心事未剖
而遽旋自後僮仆之往來乃言偶困於沉綿然以宿疴
之屢愈將謂後恙之必痊亦豈料賈誼之條速化而長
吉之遽仙也哉嗚呼欽仲已矣在閨門則孝友而無間
在姻族則遜義而相先何厄運之推移使門戶之速遭
既銜悲於此姑又抱痛於斷絃獨其身之僅存俄夜壑

之移船此道路之人皆傷吉人之不壽不獨予涕泗之
漣漣所可幸者君有子已近志學之歲君有弟可謂克
家之賢若夫受嵇子托孤之寄念翟公書門之言余不
敢以不勉君可瞑目於九泉嗚呼昔我至止倒屣出延
今我來思忍相棄捐隻鷄斗酒酌君柩前嗚呼哀哉逝
者如川

祭海豐宰顏養智文

疇昔之日辱君文盟芝蘭臭味金石交情君來吾莆大

揚教鐸我時過從論文甚樂君自莆歸得宰惠陽懷此
美人在天一物色便郵將寄雙鯉有自南來曰君止
此嗚呼清源勝彥壁水名流穹車方駕誰折其輶海內
年來善類彫瘁公亦無年歿於下位有子尚幼未能扶
喪賴有玉季扶攜還鄉丹旒載道見者墮淚薄酒一卮
朋友之誼

祭從兄鸞少冲文

嗚呼能不能謂之才幸不幸謂之命世有妄男子而僥

倖成名亦有老文學而終身蹭蹬此志士所以多苦心
必蓋棺而後事始定吾兄少年席珍待聘方聲譽之交
馳屬春秋之鼎盛夫何抱璞而啣卞和之寃鼓琴而無
子期之聽澤水涸而蛟龍愁暮天寒而騏驎病晚始豁
然而達觀蓋未始不順受其正某幼辱兄憐長知兄敬
每旅試於文場惟元方乎審訂我及壯而策名兄晚節
而尤勁將收功於桑榆何舟移乎宿信告殮斯辰痛根
天性卮酒陳哀誰知此疚

祭鄒給事母葉夫人文

昔者曾子子路初仕之時俱有遺祿逮親之喜及夫親沒之後方為楚國之仕參則謂椎牛之祭不如及親之雞豚由則謂列鼎而食不如為親之負米是則為二子之親不能不遺憾於此孰如夫人克生令子垂三十年優游甘旨奉楚堂之養則坐享重茵開魯侯之燕則誕膺多祉凡參也由也其親之所無者夫人皆得而有之矣惜夫萱草之春未央白楊之風遽起胡不及見列辟

之回班而乃遽罹憂於陟屺僕也昨筮仕於蓮池荷元
戎之知己及銜恤之來歸每懷思於湘水聞夫人之訃
告增寸腸之哀毀悵望素帷莫能至止寄情斯文有淚
盈紙

宜春郡博士陳茂獻哀辭

天之生賢兮孔艱既曰生之兮曷不其延豐之才而嗇
之數兮意乘除之或然吾非為茂獻惜一死兮蓋為世
惜一賢木堪棟於明堂兮俄漂搖於風雨玉可藻於清

廟兮遽委棄於泥土不曰有命在天兮杳乎不明其故
豈物之生而有才兮皆鬼神之所妬充茂獻之純孝兮
可移為忠以事君雖欲為而不可兮猶可證於方冊之
遺文施茂獻之友悌兮可熏善良於國人雖施者之不
遐兮猶可挹其紫荊之餘芬嗟人之達道兮豈不知順
受其正獨我輩之情鍾兮有不能以自勝命短而所存
之甚長兮吾於君乎何病尚其相爾弟昆暨後嗣兮天
至斯而始定

欽定四庫全書

集部
臞軒集卷十二

詳校官庶吉士臣李傅熊

主事臣呂雲棟覆勘

謄錄監生臣張曾壇

欽定四庫全書

臞軒集卷十二

宋 王邁 撰

古詩

試石鼓墨得月字韻

水聲響崢嶸山勢高
律砑我居山水間
瞥焉五閱月看山寬
眼界聽水清詩骨妙
理在濁醪淡交寄薇蕨
翻書明月軒淪茗清泉
窟一雨釀黃梅連朝來
不歇雲疎漏簷光晴意
猶鶻突卓午睡費騰
起來足不襪搔首獨無

言書空時吐吐天宇未清夷世途良艱艱丈夫志未酬
徒有衝冠髮俛頭習科舉與俗聊汨汨壯圖要有待非
久黔吾突富貴漸逼人榮途輒須發

題元山蔡行可對青亭

終日在山中不見山可愛欲識愛山趣須在山之外南
山不古今悠然與意會西山無朝暮佳致固長在蔡君
金玉人結亭避闌闌面面蒼壁屏坐卧與青對晚曦射
紫翠宿雨濯藍黛能消幾兩屐不賞此竒槩芙蓉爲君

裳蘭茝爲君佩今非避世時乃學陶謝輩諸公富唱酬
拔戟各成隊我出一轉語功成身始退君爲端明胄忠
孝後必大山靈縱有盟一出合破戒蒼生正有求富貴
不渠貸山債會一償相期在晚歲

題弟綱舉之奉仙之室曰小蓬萊

吾祖有方平曾與麻姑會滄溟化爲田彈指五百歲又
有仙人喬神游八極外朝寫作鳧飛世緣比蟬蛻寥寥
千載後之子得正派風度亦可人春秋况未艾朝搬紫

河車暮結飛霞佩嚴事鍾與呂信心終不退經營白玉
壇肖象儼相對四面來青山獻竒飛羽蓋爐熏徹玉虛
劍水清塵界瓊笈閱千函丹方探三昧誰謂三見遙近
在吾境內蓬萊若云小孰能爲之大

跋黃京甫必昌提幹四書講義

吾友黃京甫器資厚以渾自了場屋債徧參諸老門四
書不釋手日旰忘晨殮超悟到聖處不能忘于言序講
凡五篇字字比瓊璫伊洛有心印傳受百聖源紫陽有

心燈矚破萬世昏得君再紬繹提要鉤其元如印一洗
滌篆籀宛然存如燈增膏油光焰大且繁我昔從師友
是書粗討論老大學不進德性焉能尊因君重感慨舊
聞日當溫願言剪枝葉作意事本根

甲戌九月日有食之紀異三十韻

甲戌九月秋朔旦見災青宇彗犯太陽淒淒如月冷方
其始虧時宛然蟲食四食之至於既當空懸黑餅髣髴
存輪圈中陷猶枯井雲間星晝見草木森弄影天地寂

無聲疑似非人境問之道旁翁欲語喉先哽翁今九十
餘眼未見此景爰有蟣虱臣拜跪淚沾領天高聽則卑
宜鑒愚臣請日者陽之宗千古光常炳此日何不臧臣
心憂耿耿或者天愛君先事示之警流金爲湯戒涿水
爲堯傲雖重一時憂何傷天歷永吾君今堯湯四海元
元幸公道大開明朝列肅而整祇恐萬一間左右容愼
悻方秋陰用事陽微陰漸逞不去讒慝根懼作忠良穿
天乃出怪異意欲悟觀省吾國必有人伏蒲輸骨鯁吾

君必開納小心知畏謹陽政必日修陰邪必痛屏天其
終仁愛悔過在俄頃大叫天上人齊喚金烏醒

讀林去華居厚主簿省題

病夫夜不眠五鼓始交睫懶起比吳蠶清夢飛莊蝶恭
承高軒過不及倒屣接惠我百篇詩珠璣何煒燿五言
比長城一望皆危堞壯如廣陵散悲似陽關疊音韻最
清圓格律尤妥帖登壇禪將降咒水小巫怯永嘉富人
物往躅足追躡經術北齋陳文章水心葉林君游其門

早負賢闕篋鄉校設臯比戶外紛履屨科目苦無憑取
捨如漁獵入網多弱翰上鈎希巨鬣西廊上奏篇甲第
僅書捷低頭矮屋中壯氣不姜蒲研朱點周易修此清
淨業焚香讀楚詞時作真行帖臺府歲舉員求者例有
挾孤士之梯媒剛腸羞婦妾諸公縱憐才或被權勢劫
誰能推輓之士論得欣愜

東歸同年三山王簿賓之趙戶立父連簿仁父
黃上舍偕行分道買樽酌別

我從京華來溽暑不可逼藍縷一征衣邂逅四君子臭味同芝蘭鄉井連桑梓王君吾兄行派出銅川氏一飲吞百盃一揮爛十紙此是蠻坡人非久棲鸞枳黃君天庠英貴名方日起三年拜賜師行雪殺函恥後來幾英豪願作榜下士小連真可人犀玉浮冰峙再鼓氣不衰收科趾前美朋山萬青衿求識習鑿齒立父天族英雅非膏粱比青桂近嬋娟紅蕖映青泚名駒產天廐一日當萬里今夕知何夕德星偶同晷明月入觥船涼颼生

劍履相逢吳山頭相別閩江觜交情托管鮑同年序許
李明日懷美人娟娟隔秋水何以慰我思馳書寄雙鯉
東歸至衢城十五里頭

征衣犯火雲來自長安道浹背汗淋漓遵程行數跛險
阻已備嘗習氣覺如掃京華紈袴兒顏色差強好玉笋
酌玻瓈金盤釘水菓享此竟無端榮枯太顛倒嗟余數
之竒涉世嗟枯槁青雲志未酬午夜心如擣浪蹈軟紅
塵有懷白雲老決策賦歸歟受此大軾軻倚杖立沉吟

持盃澆磊砢生平忠憤心皎皎通穹昊一身不足憂世
途深可悼往歲淮南間邊吏困科瑣金鼓聲漲天溝壑
填肝腦一旦計之窮首謀伏天討眈眈慾無厭百計需
金寶今者馳使車囊橐費賁裹乳臭坐廟堂苟免及身
禍誰知鴻雁鳴朝夕不相保旱蝗莫爲災四望無青草
我輩獨何心日夕憂江左豈不欲救之勢力顧未可敬
持一瓣香好爲蒼生禱何日鞭五龍澤之以霖潦手提
四方人脫之於水火

父執德化陳宰叔高槩寄詩和之

欲作好官易與時同俯仰欲作好人難前修嚴獲矩馬
安爲巧宦孔光位宰輔貽臭汗青中詬罵之所聚胡威
清比父魏暮直肖祖世家有若人百不一二數夫君少
壯時筆力迫韓杜晚歲宰一同治最方卓魯中都清要
官唾手可搏取徑掛神武冠去國身如羽隱几挹青山
稱觴環綵舞導養學熊鶴鉛汞成龍虎妙香叅鼻觀虛
白生靈宇興來聳文筆象物蒙藻黼客至開香醪鯨量

少儔伍我登清風堂人今道則古敬宣與狎崇所擇聽
張禹

別永福張景山

我友滿天下面交如斗量最晚得張子羣中孤鳳凰秀
氣分高蓋妙年侔洛陽趨向頗近道才具已老蒼蘭若
參文盟過眼五月彊別我求贈言握手吐肝腸學貴根
書茂積貯焉可忘如行千里路須具三月糧文亦有活
法先使意氣張如破初敵壘須擒賊中王子家藹文獻

庭砌多琳琅歸歟力種績宜親師友良植本日以大養
氣日以昌學豐敷爲文如富出所藏襟期要犖犖俗物
徒茫茫他日泉石下候氣視北方知有滔滔者非予誰
其當

白髮吟

明發覽青銅寸白墜華簪懸知不能免豈意遽見侵憶
昔隨羣兒總角混青衿縱弱不好弄既冠知惜陰時開
磊塊曾澆之以古今二十偕計書進士路歌歛遲遲十

四年一第酬苦心今年已六六暮景來駸駸一髮照我
眸衆髮立森森忽然一失笑政要渠相尋有田願種玉
有腰願垂金富貴豈不好勞鹿那能禁何如一床書侑
之綠綺琴遠參蘭茝香清玩山水音高歌月滿架醉卧
斗橫參待教頭半白掛冠老山林飲犢青草浦盟鷗白
沙潯憑虛喚張陸聽我白髮吟

白髮嘆

日月轉四時團團輟清昊人生一世間輕塵棲弱草寒

暑不相貸容鬢豈常好嗟予涉世紛聞道苦不早塵勞
縱掀簸冉冉風中葆行年將四十素標已插腦星星纔
數莖爛熳色勝縞耘鋤雖暫無安能遏衰槁黃精似可
餌已白恐難掃幸有琴心文真訣堪却老華池溉隱芝
青青可常保斯理不吾欺從今勤探討要當驗他時難
為常人道

青銅作明鑑皎皎鋪晴昊照我沐初晞幾縷經霜草本
無適俗韻頗識林園好何為浪自苦落得衰顏早懸知

日夜改青絲成素葆
達人遺世累土木視肝腦
那於形骸間計校元與縞
彼獨何人哉而我嘆枯槁
壯年不可挽過日如霜掃
但有歲寒心不逐冰霜老
誓開三徑荒種藝雜庸保
雖無大藥資尚得恣幽討
此外盡悠悠置之不復道

題江郎石

萃律天外來生平眼不識
道傍問行人指此爲何石
云是江郎神茲地顯靈迹
岳瀆孕精靈陰陽陶器質
壁立

千萬仞葱然翠欲滴縹緲出塵寰上與太清迫伏如蛟
龍蟠聳如麒麟逸開如旌旗揚斂如圭綬直交酬如大
賓相敬見顏色特立如正女齋莊不可昵勇如毛大夫
囊錐推穎出烈如藺相如挺身衛全璧勁如傅介子叱
咤在三尺直如太史公巉巖操史筆裒萃許精英狀出
大奇特誰言造化工於物無雕刻我來揖清標倚杖立
歎息年來天柱傾誰是扶持力願移此靈根支拄天西
北三光五岳氣要使合爲一血食千萬年與國同無極

和趙簿題席麻林居士小隱四韻

公子有奇節，歲寒心印松。千邱仍萬壑，是中雅能容。晚來萬事懶，獨有詩不慵。諸郎富文采，筆端聳孤峯。

繞園萬竿竹，奇壑千丈松。此物匹高士，坐羞桃李容。客至談世故，接之令人慵。相看兩不厭，晴昊倚高峯。

碁聲響蒼石，茶竈燒枯松。故人惠然來，風竹爲先容。野性曠而適，機心疎更慵。生憐謝安石，携妓汗名峯。

笙簧豈不韻，雅景受風松。紉綺可爲裳，靈均采芙蓉。古

來曠達士世賦亦太慵可望不可押人如雲外峯

題趙別駕委齋詩

別駕來訪別徵我委齋詩敢問委之說別駕自發揮萬
事悉委分吾何容心為抱槩游文屋去取委所司一戰
偶得雋敢誇詞藻竒隨牒走仕途薦舉委所知一朝獲
通籍敢恃妍媚姿不見百里奚非黠亦非癡爵祿委倘
來飯牛牛自肥不見塞上翁無喜亦無悲得喪委自然
失馬馬復歸委懷在琴書粟里真吾師委順聽時命香

山不吾欺吾以名吾齋曰委不亦宜王子曰不然我言
異於斯人性涵萬善其位配兩儀凡天所委付受者不
得辭行藏道汙隆進退時安危委禹以治水胼胝敢言
疲委尹以復辟寵利非謀私經制委姬旦述作委仲尼
今古理無二聖賢人可希綱常或淪斃委我開訓彛楊
墨路必闢韓莊門宜麾宇宙或傾仆委我力扶持補天
出媧石浴日升咸池饑者委我食寒者委我衣一或負
所委是謂天職虧若君所言者莊老同一岐梁以苦空

壞晉以清談隳流弊至委弃往事真來規世道真險隘
天將委之誰上不能使爾夫豈無良醫因詩重感慨當
有評是非

送族姪千里歸漳浦

吾宗居漳濱粉杜足不到迫歲携琴書迢迢以謁告
草木同臭味水火隨濕燥行色念辛酸開樽勤燕勞葭管
陽方升凌室冰新破語言頗有味知子爲跨竈日暮望
白雲江頭理歸柂別我乞贈言求以爲宗好謝安自薦

元杜子每念佐子真元佐流我譽不爲過惟學無他達
損益在勤惰我昔少年日螢雪功自課嘔肝綴文詞懸
膽警坐卧甌寒心自憐筆凍指欲墮牛羊事芻牧鴻雁
謀梁稻慈親日待養一第天所報願子繼自今書田深
種播定力要堅持居安謹無躁青雲信有梯我已爲前
導後來當有人袞袞如響和洗耳候凱音嘉節迫吹帽
呼童辦楮英爲子征西賀

四十自壽

前四十年非追之已莫返後四十年是圖之良未晚水
涸自見涖木落知見本善者契吾機今復猶不遠養生
先節慾葆粹在懲忿聖賢人可爲勿使善惡混

寄居元職方北第呈西鄰盛進士

解褐去鄉里宦游一紀餘抱感今來歸茫然無屋廬暮
瞻還林鳥朝羨趨淵魚淵林各有歸曾不魚鳥如元侯
雅好義假我舍北居入門掃埃壒閑草以次鋤貧賤誰
顧門豈必容高車餘杭衆富家碧瓦侵太虛土木雖無

情亦與儒冠疎所幸並舍賢昔年同詩書何茲瓦礫陋
復爾鄰璫璵鄉田及同井此義無忽諸

寄同年新塗王宰夢弼

玉筍高嵯峨異石光燦離紫蓋有佳人出爲花縣宰佳
人秀吾宗天姿最高塏飲水抱絲絃紉蘭纓蕙萑疇昔
糾郡掾辯獄亦幾殆人命我所爭斗粟何足愛上官翻
相知剡薦異寮窠及膺民社寄直道肯自悔以柔克高
明爲政尚慈愷農扈飽春和荒年獨不餒猾吏履薄霜

洗手畏納賄桑間雉正馴壁上魚多鯁昔我在湘幙相
從垂兩載書生守方拙時粧不入隊惟君雅知心刮目
賞竒磊君有桃李栽我獨芙蓉采無何風木悲天乎余
何罪歸歟泣君蒿久矣嬰病痲除夜接君書烏欄墨瓘
瓘訪問死生餘警語鞭不逮為言剛近仁直性終難改
近乃加和平痛自鏟光彩萬事必宗道衆流須納海隨
時少屈伸正直固常在再拜君之言書紳戒荒怠時事
苦間闕誰歟穆天緯來書尚可為蒼生久相待

靈白湖歸憩林氏墳庵僧出能誦予舊詩設茗
椀蒲食以詩贈之兼寄呈林六十兄

霜風襲客裘朝日曬農背誰遣役此軀隱痛在五內宿
草漸重生跼踏處覆載扶衰策瘦筇乞靈問龜蔡往來
纔信宿屏息過闌闌夙駕三十里僕夫已告憊小庵闕
道旁丈室藏法界叩扉僧出迎面熟不猜怪白髮久不
梳爬癢得痛快荷設茗椀供仍有蒲食配去此已五霜
重來發孤慨一飽猶可謀三釜已不逮退藏心甚甘世

故肯相貸博陵隱君子堂萱春未艾悠悠我之思此日
君當愛

簡延平李公足擇善

原注時隨侍其父爲
典化令余在制中

昔人重相思千里且命駕我家去游洋相望纔四舍偃
息豈不思吉服詎可借惟憑一雁翔敢望雙鳧下日者
聞琴堂墨綬將解却東閣領羣英勝遊當首夏惠然訪
九仙雲物爭迎迓拂石納晚涼秉燭娛清夜吉碑共摩
挲吉夢相矜詫物色故老言赤鯉何年化題詩富錦囊

仙境爲增價是地近吾廬過從何未暇初傳尚半疑後
信良多訝世態如浮雲炎涼更代謝高誼定不然寄聲
來慰藉

簡林公似

窮猿不擇木祥鳳宜棲竹高門結駟榮陋巷一瓢足仕
有時爲貧貧乃急於祿夫君何所欠百事盡從欲新諧
種玉婚大敞堆金屋鏡裏顏尚朱庭前萱正綠中州不
徜徉炎海甘馳逐遂令君子心度以小人腹我貧甚去

年全家久食粥獨醒妬人醉譏諷那免俗名節千載光
富貴一炊熟朋友嚴簡書敢以石攻玉

寄浙漕王子文堃以思君令人老五字為韻得

詩五首

長沙一傾蓋情好如塤篪間關十寒暑何時不相思君
為睢邸教再挹冰玉姿升堂拜壽母摩頂識馨兒叙舊
方戀戀臨分轉依依自是成鴻燕羽翼竟差池音問久
不接清宵夢見之魚腹得尺素羊胛經幾炊陳雷不可

作千載同襟期

我友半湖海知心吾子文君忙我已老事事不如君君
生通貴家我出寒素門君披貂毛裘我著犢鼻禪戲綠
君有母列鼎共清溫我早失烏哺空山悵白雲弱冠君
有子世科將襲芬我子方垂髫詩禮未有聞凡此皆不
如官職不必論

原明有申公公休繼文正後來諸名家有子多不令堂
堂先太史孤峭立萬仞身不爲從官美謚君所命子文

爲之子壯歲名已盛榮華付倘來節義傳心印波流石
不移火熾玉寧盡嚮來牋天疏每讀必起敬相期輝國
史何止續家乘

西山門下士雜襲如魚鱗惟我與子文受愛異他人送
我長沙序言言足書紳贈君樵川詩字字示寵珍潛齋
養正堂兩記尤諄諄爲君說太玄藏心養靈根爲我演
蒙頤山立靜澄神先生愛吾徒不啻子弟親將何報此
德相與玉其身

我本麋鹿羣官職不要討
儋石倘有儲山林堪佚老
焚香旦告天非爲其私禱
一願屢豐年田疇足禾稻
二願息兵戈塗地無肝腦
飲水樂在中茹芝顏轉好
篤信而好學守死以善道
佩此八字符傳爲子孫寶
作詩寫殷勤未省蒙印可

與友人飲分等字韻

君詩敵曹劉我才慚碩頰
隱几共團圞醉鄉從酩酊
強吟蹙眉尖得句蒙首肯
吟蛩聲啾啾銀燭光耿耿
相看

不惜夜自足攻逆境搜腹憐龜腸
朶頤傍羊鼎論文固
非儔義氣略相等世情似紙輕
交道如菰冷願堅松栢
心歲寒青挺挺

贈傅神莊士儀

畫工亦無數好手不可遇
非是畫事難難得畫中趣
况寫佳士照又不比行路
莊生頗工此爲我掃尺素
儼然山澤臞詩肩瘦鳧鷺
老色雖上顏庾塵莫能污
生畫甚迫真餘子等孩孺
得錢散酒家無心問婚娶
醉被風雪

欺術招鬼神，妬長安多貴人。朱門富紈綺，使聞生之名。
當即懸金募我貧，亦如生正以詩窮。故一畫博一詩，兩
手相分付。

殿廷初考諸同舍約共賦詩

紹丑夏五初，皇帝下明詔。大廷策羣英，虛心問道要。初
考凡六員，同時赴宣召。宮講絜齋子，典刑真克肖。胄丞
道鄉孫，道心長返照。何殊鐘在簾，宛如刀出鞘。谷口亦
何人才德，俱富邵走也。分塵埃，識見等螢爝。亦獲在選

中所得過所料宮燭分夜輝御香供早燒羣羽競赴矰
衆鱗爭入釣意氣雲龍翔精神風虎嘯或巽入柔行或
疾聲大叫或自出機軸或工事竊剽或寫雲和音或鼓
折楊調或作朝鳳鳴或吟蚯蚓竅好惡隨品題寧復相
譏諂上方富春秋明齊日月耀涓露增滄溟微塵填嶽
嶠乙覽公平章甲科須直峭諷必納祈招箴必容庭燎
國步賴扶持民瘼需砭療詰朝已竣事杯行可以醕

謝京尹惠酒饌

逐客次江干復此風雨夜元戎念寂寥更僕相慰藉醜
醜實珍肴寵光生邸舍妻孥共感感道路或猜訝謂此
偃蹇蹤橫被彎弓射彼哉簧正巧或者石猶下同志欲
過從避黨輒驚怕曾謂十連尊理煩無頃暇惠顧及無
聊多言莫爲謝平生仗信義正色叱姦詐此樣不入時
致入人話靶明時方獻文安得有謗罵獨以殿廬中語
言少假借遂犯螳螂怒間坐鴟鴞嚇先期入簾幕坐是
罹咎獲公施不報恩高義等蒿華一言挾纊溫所嗜非

酒炙天日方清明罪過宜宥赦白壁可洗瑕煩公叩造
化

簡同年刁時中俊卿詩并序

時中吾諍友也未第時作老農行以諷其長官言
辭甚苦今爲綏寧簿被鄒帥檄來董虎營二千間
之役諸邑疲於應命民間悴於科募一日稟帥又
欲任浮屠官守之責帥以小緩謝之余退而作詩
即以所諷令者諷之

讀君老農詩一讀三太息君方未第時憂民真懇惻直
筆誅縣官言言虹貫日縣官怒其訕移文加誚斥君笑
答之書抗辭如矢直旁觀爭吐舌此士勇無匹今君已
得官一飯必念國民爲國本根豈不思培植其如邊事
殷賦役煩且亟虎營間二千鳩工日數百硬土燒熾窑
高崗輿巨石山骨慘無青擯皮腥帶赤羸者頰其肩饑
者菜其色憔悴動天愁搬移驚地脉吏饕鷹隼如搜拏
何顧惜交炭不論斤每十必加一量竹不計圍每丈必

羸尺軍則新有營誰念民無室吏則日飽鮮誰憫民艱
食州家費不貲帑藏空儲積間有小人儒旁獻生財策
大帥令龔黃豈願聞此畫夏潦苦不多秋旱勢如火願
君在莒心端不渝疇昔蔡人即吾人一視孰肥瘠築事
宜少寬紓徐俟農隙至如浮屠宮底用吾儒力彼役猶
有名何名尸此役君言雖慙患帥意竟縮瑟同年義弟
兄王事同休戚相辨色如爭相與情似暱余言似太慙
有君前日癖責人斯無難亦合受人責我既規君過君

盍砭我失面諛皆相傾俗子吾所嫉

簡復齋陳寺丞子表夫知丞併呈真西山

復齋吾之師高山儼標致僕嘗函丈間乞得四箴字及
來仕京華登門願受記復齋首肯之贈言簡而毅殺身
可成仁舍生甘取義此生尚可輕圭黍眇爵位僕退書
之紳雋永言有味充員京兆幕萬一可行志報顏斥吏
胥冷眼視權貴婉嫗孤無朋旁觀輒相忌朝肆緝緝讒
暮遭申申詈聖主初臨軒不才叨考試諸賢憚生語一

律愛軟媚我喜衆所驚人取我必棄問有植私恩了不
恤公議柄鑿不相投畧獲馬得避襪被去候潮襁褓有
幼稚少需辰之良解纜辭清渭邂逅復齋子入京方却
轡爲言東湖上英才日以萃窮伊洛淵源傳紫陽位置
要使蒲三邑薰爲善良地僕也聞斯言歸心生兩翅平
生真西山赤心愛善類誨我以沉潛意同言小異二公
負名節可望不可企勇退在盛年高卧看兒戲我行拜
二公顏面儻無愧作詩欠硬語呈似賢昆季謹勿示他

人恐爲吾黨累

親舊問盜作詩四十韻以答之亦可備野史之

錄

我來自京師己丑之十月道之建劔間行行過兵卒問
之何爲行對言聲哽咽初只因臨汀鹽商時出沒縣官
事張皇星夜聞帥鉞帥出乃捕兵此曹輒猖獗加之江
西寇恃嶮護巢穴向來誤殺降貽禍今尤烈合黨肆紛
披交鋒爭桀黠聚落四百村室廬遭毀蕪轉徙臨昭陽

孤城危一髮帥方實歸裝視此苦不切惟漕暨庾臺協
心圖撲滅移文責十連義激詞語辣就檄劉權軍專城
植鍛戲又有一老尉賈勇抗鷓鴣賴此所居民猶苟旦
暮活我聞此卒言憂憤中腸熟及歸抵吾廬保伍亦團
結或恐汀邵寇餘燼尚分裂或疑鼠狗徒乘間敢竊發
吾鄉號樂國目不見寸鐵一聞鉦鼓聲縮頭畏如鱉新
歲或訛言城居竟搬挈丁男肩欲頽稚女足不韞相顧
莫爲謀去守將安決汝知誨盜誰吾能爲汝說年來民

賊多田里困根括單丁火亦追逃戶租盡刷猛虎政太
苛攘雞手已滑剥床忍及膚椎肌慘見血吏肥富薰天
民貧怨刻骨及此皆幸災信險何聒聒古來盜賊興

此按

與下句不接考次首
和韻此處脫六句

官吏去饕饕大者籍其家小亦寘

重罰人心知是非端可以理折民賊盡芟夷雖賞之不
竊

鄭昂叔和余問盜詩未及山東事弟姪輩又問
山東本末再用前韻答之

江左百年來英雄老歲月空糜東南財坐糜驕情卒嘉定懲開禧廢食因一咽國論規使安神州聽淪沒和戎
盜金繒諱戰鈍斧鉞邇者天禍之韃靼逞狂獗一舉殄
金人犁庭掃其穴金如釜中魚靼如火烈烈乘間蠶觸
衡復有山東黠長驅淮甸間大縱山陽蕪或屠制帥家

許國或髡守臣髮

姚

魚肉我王人

苟夢王

首領春葱切塗

炭我生靈聚落炊烟滅嫚書揭通衢著語太辛辣供帳
王者居左纛將軍紱

按前首專城植鐵
戲此韻與前五異

往來青齊區健

比霜天鷗一名娘子軍犄角同生活狼心肆陸梁烽燧
競熏熱我事南方強謂可以恩結衣裳一顛倒茅土甘
疏裂納侮忍包羞容姦喋不發誰與生厲階正爾錯鑄
鐵彼計甚詐狙吾謀類跛蟹歲幣久椿儲復爲彼齎挈
邊籌乏寸長往往如拆鞭相顧皆狐疑莫能抵龜決心
知示弱非成事付不說邊民亦何辜一孔盡搜括戰艦
尾相銜義丁家盡刷需求意無厭許可舌太滑譬之護
癰疽包裹畏見血僅僅外留皮駸駸齧至骨理勢有必

然吾言非強聒惟願天聽回攬權制生殺毋倒太阿持
毋憚強弩末毋貽養虎憂毋使饒蜂孽廢藉起忠賢窮
荒斥竒餐一朝出六師聲罪行天罰名正事必成本強

衝可折衝壁許來臣寸鐵誰敢竊

按邁於紹宣三年充
考試官詩首言來自

京師巳丑十月應在殿廬被劾免官之後李全於
是年十二月寇揚州時事脗合故二詩序次在此

弔何巖

可憐何巖民何罪遭此劫寇攘發他邦警報經旬浹官
府過張皇民居少寧貼昨方科箭翎今又催甲葉厚斂

招提金名色何所挾昌言募土兵相與守城堞繡衣意
其欺急下徵兵帖束手無一人差官許專輒縣官至何
巖丁壯被威脅黔首畏墨鯨依違謀未協口或出怨咨
心實先震懾官兵胡爲來紛然肆漁獵室廬罹燬燒老
稚殘鋒缺山徑至通達輿尸交積疊敢梟平人首僞奏
譙門捷殺民汝何勇殺賊汝何怯此鄉風俗淳武斷無
豪俠目不識戈矛家盡事耕鑿豈應有叛謀誰子爲荆
聶黃巾縱挺威吾地足未涉官吏大不仁使爾血先喋

千家聚落蕃幾代農桑業一望成邱墟獨非我臣妾安
知此怪事不入賊間諜設或擣吾虛小壘真岌業舟中
敵國多况望蒸徒楫書生憂世心夜半不交睫作詩弔
冤民詩成淚盈頰翻恨天門高不與閻閻接丈夫貴敢
言女子乃咕囁

信手閱清溪詩一首依韻即事

久雨妨好春朝暮無休息出門欲有行苔滑泥餘尺四
望人烟稀千山鳥聲寂饑寒不肯歸青帝覺無力况有

黃巾徒鄰郊漸相迫虐焰挺戈矛連車掠金帛王旅猶
稽留民兵半覆沒羊狼來莫當鼠竄去無迹踐蹂清野
塵原草不能碧世運何乖張生靈罹此厄丁壯抱枵腸
駢頭受科率氛妖誰掃清氣象太窘窄書生憂國懷半
夜轉加劇相倚如輔車忍視爲胡越富家太不仁增價
糶斗石但愛囊橐豐不憂狗鼠黠甘爲盜貯儲遑恤人
饑渴光渠曷日殲苦潦何時歇作詩愧北征聊以志歲

月

携筇出尤嶺嶺頭坐俟興夫不至

我居南麓下頗利君子遯如何溽暑初涉此複嶺峻瘦
藤代筇輿路熟不待問拂石小盤跚心愛木陰潤清風
解人意陸續松杉韻掬泉啜茗芽竊賞此味俊我坐亦
良久我僕行何鈍平生性麋鹿合有幽閑分舉足履世
途退尺進僅寸曾此小遲速而足置喜愠繼今出處同
冥心法天運斯游悟窮通持與達者論

送黃成甫殿講被召

泉爲閩望郡山海來航梯琛貢交異域珠貝象玳璠腥
風易浣人濁如雨後泥不屑受點污除非辟塵犀南渡
賢太守前稱王梅溪中間西山真後有茗川倪近歲李
竹湖四賢玉雪齊他守非不賢多以慾境迷一罇苟可
投趨者由旁蹊利心長萌蘖公道生疾藜鴉見腐鼠嚇
鳳甘梧桐棲物性殊潔穢人品隨高低君侯第一人壯
氣干虹蜺天墀一長鳴萬馬不敢嘶爲州上異最趨覲
下宸奎歸裝試檢點定無南物齋時艱方急賢君命焉

可稽巨艦方解維，穹車正發輓。憶昔端平初，衆正咸登躋。如人墮夢境，忽聽警旦雞。云何不常泰，一變成孤睽。大老遽淪謝，善類誰提撕。菊坡未起南，鶴山斥歸西。朽屋費撐拄，洪流欠障隄。蜀道橫豺虎，邊城喧鼓鼙。流民滿京輔，溝壑填髻倪。弊事非一端，言之重酸悽。醫國要大藥，去膜須金篦。君子與小人，却是一巨題。願爲君子者，名檢身自裊。皎然不可玷，琳琅別介圭。凜然不可犯，貞女處幽閨。必服葦，小心始去禾。中稊義利生，一念治。

亂分兩畦老我以狂故屢爲語穿擠朝行辭鷓鷯野性
便鳧鷖附熱恥翕翕耐寒甘淒淒荷君不世情猶念故
人緋紅絮正飛零綠陰被長堤送客洛陽橋春風逐馬
蹄相期在遠大不敢惜分携

有客一首寄溫陵史君趙侍郎涯

有客至自泉爲我出嘉話泉得趙史君誰人不稱快天
生冰玉姿系出龜琴派標峻埒昭回氣清融沈澗方在
諫省時朝紳推鯁介及膺承宣命未到心已解真李報

政後紀綱日大壞有坐泉山堂不守孟水戒戶庭交賈
胡寶貨通賈賣繼者廉而慈卧疴力衰憊暴吏恃饗官
誅求及管蒯大姓及細民怨仇起眦睚我公方下車當
食輒興喟察屬愛貪泉爭飲不爲怪予將輩元結誰肯
伍樊躓職曹與舫屬時號大駟儉兩疏劾四凶人喜如
爬疥州胥富蓋藏至則繫以械曰此其渠魁豈止爲胃
絳縣官庇黠胥期限稍寬解山判吁可驚即日命追解
惟仁必有勇勇去禾中稗良善苦勢家至則行決决府

史例橐姦今乃聽自敗無欲始能剛剛拔園中薤我起
瞻四方風濤極澎湃砥柱設無人淪胥靡所屆理欲差
毫芒公私分限界公豎硬脊梁浮榮等草芥出處民戚
休行藏道隆殺授公以師旄一路息彫瘵位公以中書
舉世警矇曠宇宙倘清明行有大除拜作歌者何人江
左狂生邁

題洪知觀靜齋

蠻觸當戰衝蚌鷓據爭境相持無了期復命終歸靜人

事苦紛拏世態異矣冷遠抱異俗觀照以清明景余生
涉畏途所至虞機穿求富恥執鞭圖名成畫餅道侶得
洪師喚我夢中醒師如辟塵犀神觀最清警葆粹息天
倪運斤優匠郢結茅規數椽討勝事幽屏楹檻疏以明
規撫肅而整畫水篆飛烟風來幡弄影開卷課黃庭煮
茶汲清井以靜名其軒會處心自省吾廬雜塵囂相望
限一嶺煩師縮地脉得我便造請別來火雲張今見霜
宇淨寄詩當梅花一笑師當領

學易齋

太極分陰陽生生之謂易易有乾之元生意露消息先生易中行日用而飲食全體純是仁本自元中得克已下工夫心臺皎如日處則為顏曾出則為禹稷所以學易齋孜孜奉天職滿腔皆春和八荒開壽域

題余君肅曰嚴忍齋

君肅吾良朋天資秀而穎以忍名其齋求余為序引余聞及制心其字謂之忍一忍寬百憂百動歸一靜人心

本至明萬善集虛境外物一障之天真隨晦泯意猿肆
頡頏氣馬浪馳騁以忍作防閑如物有繩準聖賢養心
學最切是懲忿愚者一不校魯者三自省行行無取才
宜爲夫子哂師德豈懦夫見善必操秉唾面令自乾可
以愧不逞公藝忠孝人家法肅而整九世有盤盂一字
其要領願子繼自今去過貴乎敏育德必體蒙辨義直
觀井意融妄盡消心清事亦省我少染習氣近亦痛除
屏作詩雖警君且欲以自警

堅固堂

五常之有信猶土相生植四端有諸己體用歸於實先生於實地外方而內直硬作鐵脊梁許身衛社稷神授五字符得大堅固力不爲聲色搖不爲利害怵所以堅固堂山立而玉色願言愛精神自壽以壽國

常惺惺室

性命一同源萬善天所賦五行水生智正以虛明故先生原命宮水與金夾輔清質自生明冰壺澄月露窮理

以致用幹事必正固與國作著龜應物公權度所以常惺惺一室神明護室中主人公壽比喬松數

代簡奉寄三山方時父過游幾叟明復

昔我游三山稠中得二友初交方時父後識游幾叟大比獻能書厥歲在丁酉垂釣文海中修鱗上鉤否蔡簿校文回曰方其所取有高說夫者姓名出其右高游本弟昆紫荆偶分割游雖遲再薦楚弓楚人有余評時父才進士中少耦詞絕似秦七詩已迫黃九幾叟尤不凡

耿耿良自負英辭沮金石直氣干星斗等是青雲人科
第爭前後射策對天墀會須爲舉首三年一掄魁須服
天下口毋爲陳誠之要作張無垢狂生分不才垂老未
覺醜嚮坐太饒舌相看擁衆手六階何惜鑄百謫亦甘
受不愛騎鶴姿看人作太守只讀相牛經教子事農畝
乏地堪置錐仰天頻擊缶二君最知心一別忽許久作
詩分寄之或賞千金帚併簡潘庭堅何時一樽酒

寄陳士登元龍士登書問盜且責予不貽書當

路爲剪除計予方以罪歸有言誰見省作詩謝
之

悠悠我之思東里陳驚坐更闌夢持環晝永心搖蠢一
春苦風雨我困南山餓君樓百尺高頭上天幾大於我
未忘情更僕修夙好耿耿憂世懷急於聞警報爲憐上
四州豺虎正喧噪虐焰欲熏天獲人爭斬剗將州豈不
武棄縣如洩唾官軍望而奔所至徼宴犒鄰境近憂惶
刁斗急巡邏君責我以書何時乃高卧曷不出良籌亟

爲當路告當局自能迷看局當不蹉我壯君之言義起
千夫悞顧方謹三緘此戒那可破諸賢各有謀何欠儂
一箇君家昔太邱能愧梁上盜毋爲陳君短此語更傳
播吾家昔彥方能正屠牛暴勿使王君知叩頭甘謝過
兩家俱德門今有若人麼前時何巖警召亂在縣左賴
君告少仙全活幾髻髦但推此仁心古人不難到鄰里
貴有恩急難相憫悼裂券蠲宿逋減貲糶莊課肯令州
中人指我爲竒貨盜亦有道者仁里敢桀驁忠信蠻貊

行豈弟神明勞我持一瓣香日爲蒼生禱吾君甚愛民
恩德侔覆幬社稷福靈長妖氛行屏掃吾言非誕迂有
唱吾須和

送表弟陳一鳴堯章入京

科目狹爲途英雄多短氣賓賢詔一頒應舉紛如蝟低
心逐時趨練語避忌諱得者固僥踰失者徒歔歎巨鱗
不上鈎修翼不入爵鄉選亦孔艱計臺征以彙我嘗校
蘭省厥歲在乙未時收甲乙科多是戊己尉國步矧多

艱志士發長喟襄蜀漲氛妖江淮方鼎沸毛錐無能爲
長劍使人畏朝能立寸功暮可攫富貴二子趨玉京道
遠不吝費進身假梯媒流品孰涇渭世科藉此登親望
始寬慰老我謬憂時周發追恤緯諸公忌生語悉力攻
謗誹藿食可充饑荷裳尚堪衣功名付君等山林吾有
味

以喜聞過墨贈吾壻鄭純父玘

西蜀游文昌贈我墨兩箇墨上署嘉名名曰喜聞過過

夫人誰無剛褊柔易悞衆人巧自文君子喜人告予性
失之剛所患在急躁未嘗不佩韋因循及老大不能如
師德受人對面唾至使巧宦徒目爲背時貨子性失之
柔鮮有特立操嗜慾微萌芽左右紛投好不能如乘崖
按劍警坐卧中心欠所主恐似風搖蠹乃翁匹前修德
行圭中瑁承家合有人前猷宜久蹈賢母慈且嚴熊膽
親調和養志最爲難家聲出堂奧吾女正抱疴朝夕煩
拊勞要相敬如賓毋縱欲長傲女亦嘗聞詩綠衣戒顛

倒候其疾之瘳，蘋蘩能采，芒內行儻不愆。事業當遠到，
賢者後必昌。積善天所報，持墨為子箴。進德謹勿惰，墨
卿子良師，莫被渠看破。

送春有感

東君行趣裝桃李，事如夢蝶懶欲息。游鶯老不好弄，殘
紅正可憐。更禁風雨送榆莢，羞獨飛却惱楊花。共去年
於此時，客食紅塵，闔眼看豪俠。兒躍馬青絲鞵，美姝舞
娉婷。吹簫來紫鳳，開樽六一亭。偃蓋飛來洞，我亦強行。

吟詩成和者衆時序易推移人事少閒空翻思年時樂
已如耳邊哄清曉坐孤寺晴曦照華棟沙平嘴帶鷗山
遠腰橫竦閱書眼倍明拈筆手猶凍掃地焚甲煎呼童
開臘甕汲井得甘泉淪茗試新貢短章寫我懷謾遣兒
曹諷

獵者

原注見方雷桂
子直言共事

山中有獵者設網張四隅稚麋爲所絀性命懸庖廚母
麋至網外躑躅相悲呼明知獵者意於已併覲覲奈愛

不可割投網與子俱獵者偶省悟攢眉發長吁縱之與
偕活長揖謝獵徒焚網毀毒矢放鷹逐韓盧人物強非
類天性元不殊愛母寢皮猿惜子喬腹魚人均作此念
可廢佃與漁獵者仁孝心洞然貫體膚彼爲中國穿愧
見此獵無

壽方右史德順大琮生朝

大哉天地仁生意無盡藏芳春三月時五陽正敷暢在
卦則爲夬澤下於天上篤生萬人英出應蒼生望退然

處鄉閭溫恭加直諒萬頃波汪汪一國和盎盎凜然立
朝廷謹論動旒纒張膽輸蓋忠顏斤庸妄寧爲鳳鳴
陽不作馬立仗玉皇笑點頭諫疏堪屏障讒者何人斯
嚴科欲監謗網常盡戮淪天日忍欺誑白璧汙蒼蠅鳴
珂辭翠閣膏屯施未光幹蠱遂高尚郭外新結廬野色
耽虛曠積書遺兒孫開筭延輩行及此紱麟旦仙壺敞
方丈台宿煥祥輝喬雲賓景貺有客前稱觥致詞太豪
放海內今何時四面波濤漲督府冊元戎廟坐轅門帳

妖氛不能清，惻焉賴汝將。都堂留一老，手携靈壽杖。顛
危不能扶，又焉用彼相。時流忌生語，相顧效啞瘖。回首
憶端平，芳菲僅一餉。大號正揚庭，一陰敢陽抗。治少亂
日多，古今同證狀。公抱葵藿心，未忘太陽向。天運有推
移，陰陽迭摩盪。夬進則爲乾，羣龍神氣王。公主善類盟，
任重力量周。道當中興方，叔猶必壯松。茂宜栢悅呂，
鳴因律唱喚。起矍鑠翁吾軍，亦可張壺山。獻寶熏壽水，
足醇釀一瓣。虬吐烟一吸，鯨吞浪壽公。乃壽國他語，徒

冗長玉鼎願精調金甌保無恙

書懷奉簡黃成甫史君

憶昔紹定元被命考廷策偶過袁君房玉墀日將夕案
頭得君文喜躍越三百張燭朗誦之相與手加額若人
作掄魁餘子當辟易時有詳定官嫵君多指斥衆默余
獨爭言厲面發赤紫宸一傳臚壁水推巨擘諸君始相
賀時相頗不懌爰有小人儒從旁肆蠱螫諫官工逢迎
霜簡肆摭據此事人能言本末甚明白暨于端平初天

奪老姦魄散地起忠良邱園紛束帛君老登瀛洲講筵
賜重席余亦試玉堂朝有愈之跡啜茶熏玉蚪投餅呼
金鯽同校南宮文等是西山客無何陣脚動君出爲方
伯館中失名流我輩苦嘆惜西山遽仙去局面日改革
余入對未央苦語出肝膈淮南寃未消元載家當籍外
黨分牛李內寵怙秦虢臣愚懷隱憂厚地具敢踏虎鬚
敢一編龍鱗敢一逆自信填海隅復中含沙射移舟返
蓬萊伏隩甘冰燄君正舞萊衣清香籠畫戟年豐富紅

倉風順多琛舶我舍抵是州相望纔四驛幽棲懶及門
一再通書尺起家倅障濱始訪二千石居官未半暮臺
評又尋摘既罹關虎嗔宜有人猫厄歸途抵溫陵除夜
大促迫所親有室廬許我相假借蓮燈看爛紅柘酒浮
重碧去家差不遠朋舊來絡繹雌堂在何許一望弱水隔
山鬼巧挪揄室人交徧謫平生重名檢義利最知擇冷
眼視與金寶身甚拱壁世途赫赫炎衆手所共炙誰能
效李錐作計事鑽刺蒲葵安可常秋至輒拋擲貴賤見

交情書門何怪程趨時豈不好嗜古業成癖羣飛任刺
天甘剪籠中翮丈夫身計輕憂國愁如積向欲恢三京
今日蹙五百西蜀斷咽喉北軍患肘腋流民滿京師戾
氣成疾疫強寇恣咆哮行人飽需索廷紳倒手版淮帥
羞巾幗南海下蒲輪西人望袞舄病劇乏良醫棋危需
善奕君行覲清光何策輸忠益急須息邊塵徐可壽國
脉任責屬諸賢臞儒老山澤

寄惠州陳史君真卿

千仞羅浮山蓬萊分左股有詔陳太邱剖符爲地主皇
皇太邱門德星之所聚前光盛胚胎後來紛衆甫共惟
休齋公遺教垂鄒魯君侯其聞孫風烈不忝祖繼以詩
書帥遺愛比召杜君侯其英嗣真清亦如父嚮者位于
朝穹官可拾取不能枉尺尋矧肯效媚媼翩然乞一麾
來此開藩府此郡舊富饒廣中號樂土年來困軍須炎
火無冷釜鄰盜闖其藩燒痕未全補噓枯待仁風醒暘
仰膏雨迎輅兩朱幡驪呼十萬戶朝宣上德意夕問民

疾苦爲渠作豐年愁嘆變歌舞得結數十輩萬物氣可
吐行奏循良功入布承明武走也山林人本無素宦譜
妄言宗社事屢犯君相怒緝緝惡樊繩耽耽畏關虎歸
歟結茆庵課僕理蔬圃餘子易炎涼眼前何足數君侯
誼薄雲寄詩傾肺腑

還氈行

老屋數十椽下濕上又破無端野狐精昏夜入爲盜竊
我三重氈目之爲奇貨持以獻朱門曰此堪媚竈自余

失此物志意不少挫苦節凌歲寒羞顏薄時好命義守
大閑潛深仍伏澳客從北方來特以吉語告舊物將見
還前甌元不墮余笑與客言的有此說麼孔光坐廣堂
當局已昏耄余嘗對天仗正色數渠過其心不能容未
免含疾媚石顯在宮闈威福弄幽奧余又疏擊之見面
定渠唾其術方盛行及此必圖報客乃寬余心少安謹
勿躁聖主赦宿憊仁恩等天幬昭相愛善類德量如海
大讒者害莫成匪伊氈自到未幾符其言客喜相問勞

勸客勿爲喜我且爲時悼米石三十千杭人死饑餓敵
寨七百里淮人共斬剝窖雪飛無留融風扇炎燥潮汐
來無時民廬陷泥滂旱魃肆陸梁妖禽輒鳴噪殞星光
射人雨雹威尤暴地軸疑翻騰乾文訝顛倒昔余出硬
語萬死敢一冒廷臣謂雲狂相國嫌愈傲不幸暮年間
前言多踐蹈今居山澤中日向蒼穹禱一願雨暘時田
疇足杭糗二願干戈休邊境息巡邏庶幾老餘生農圃
得自課保此狂生名比方散人號不然瞻四方欲往誰

前導雖粟不得食况有氈可卧人品有高卑才氣分銳
情嗟我甚低垂賴君起吾悞

述夢

午枕避塵囂夢乘銀潢槎好風吹衣袂墮我天之涯羣
仙赴號召驂鳳來香車一見如故舊絲麟酌流霞或鞭
石爲羊或握棗如瓜中有汗漫生盤礴埋丹砂誰言仙
有道挾術相矜夸顧我亦可學正坐一念差我笑謝之
言仙凡各有家悠悠御風還聚散如團沙繩床一欠伸

茲遊真幻耶吐吐置勿論呼童煮新茶

辛未中元記夢夢與一僧談世事良久問答中
有凡事如此汝曹勉之之語既而造一境如仙
家居厥明用夢中八字爲偈末章反騷

一念稍分明天壤異仙凡諸相等歸妄天真要無凡
物非我有秋毫不可貪只此爲上乘其諸總虛談無字
經可閱無言禪可參白雲過前山明月映空潭

蘧蘧一夢中了了三生意法界如許寬此生亦特寄誰

言玉局仙元本是法器不解自磨礮因人亦成事強顏
游人間聊作逢場戲山色溪聲中略得些滋味

石塔本無縫吐光萬丈餘不是風火扇又非喉管噓此
光胡爲來塔亦不知渠解作如是觀身心長自如塔身
俱著實光心等是虛虛實歸一致無乘亦無除

鑿空談荒唐我止不爲此故知又故爲頗悟前生是憑
誰照前因斯言特戲耳既是無今古如何分彼已須彌
一點塵萬劫一彈指無失亦無憂無得亦無喜

禪悅既無門仙居在何所與渠無半面一見相爾汝霓
裳製未成翩翩欲高舉身如一羽輕去天才尺許胡爲
造此境問之不吾語止緣崆峒中蕭然無物貯

世人欲不死焚香事大羅死後欲超生將身靠彌陀个
裏不透徹仙佛如子何我素不持戒焉能斷腥臊獨有
一寸珪明白不可磨學仙與學佛此事付兒曹

擣齋餐鐵杵此味知者鮮乘車入鼠穴聞者知其舛打
鐵作門限鬼笑定不免點雪紅爐中達觀理甚顯當局

自然迷正欠撥一轉上馬奔前程此著須自勉

盤中有止水歷歷見鬚眉能定乃能應人心固如斯至
誠本如神聖賢不吾欺鳴鶴方在陰其子輒和之天未
降時雨山川雲已知誰能舍我龜而觀爾朶頤

贈談星達士

列肆競談星謬者十八九達士何許人儔中推好手精
步宿羅胸縱談鬼擘口技絕固招窮鶉衣不掩肘竭來
訪臞翁意欲相擊扣翁命翁自知不問子休咎蒼生命

甚危子亦知乎否魏闕妖狐翔吳江水獸吼馮夷肆陸
梁富媪難載負強寇噬邊州湖堧經踐蹂王師戰且弱
鉞鈍甲兵朽流民滿江濱溝洫紛骸體京米貴於金十
千可一斗暮夜光燭天彗星大於帚災眚此非常其敢
飲以酒都人極皇皇如魚驚在笥國脉眇一絲病固有
從受西山堯於前鶴山繼於後洪蔣與李徐俱作修文
友吳訃漫塘翁廣哭菊坡叟天爲國生賢福賢理宜厚
何事數鉅公不爲國耆耆周堪劉向亡老光握靈壽元

城了翁去賊京得皓首賢者今餘幾其生皆不偶或入
在朝廷或出爲牧守或未脫丹書或猶耕岩藪煩子布
星躔爲余細分割孰可坐廟堂孰竟死田畝孰堅如松
篁孰脆如蒲柳天如祚吾宋存者必長久狂生何能爲
自分安老醜無地堪植錐仰空長擊缶昂藏作丈夫諂
佞羞妾婦寧可效能經不出隨狗苟但願世道寧天宇
息塵垢廷無憮士人周召置左右邊無兒戲軍廉藺善
攻取庶幾老餘生官職乎何有閒日教子書不教子學

走

水口上舟呈同行傳月山長

汭流上嵩江江闊流益峻時方良月初打頭惡風信老
翁把柂立首叫尾必應大男前運篙風激水還噴小男
上拽縴石行路復奮後退輒丈尋前躋不尺寸偏仄一
堵中危坐易慵困冷雨去復來前山邈難認江天暮漸
低好風來一瞬帆飽去如飛兩程疑可併舉杯囑月山
凡物有定分壯年登王官轉盼更五閏星沙罹閔艱日

轂轉顛頓方頭忤時流失脚落陷窅巧宦疾以馳笑我
拙而鈍如登今日舟易退難於進自知平生事百欠無
一剩饑寒駈出山歌笑破羣悶獨有不自欺心可與天
印人爲固多端天定或能勝願如晚來風先逆後乃順
得酒且酌斟升沉付天運有窮必有通無喜亦無愠

送林公似有之宰古田

余與林公侶生長南山南吾翁與乃翁宿望俱不凡或
晚登黃甲祿不霑斗甌或因頓場屋補勞僅青衫執手

授遺編尚友遷繼談家法無諂語妙理靜中參
丁丑俱一第苦盡稍回甘蹭蹬二十年令纔換頭銜嚮來同登
者青雲徧騰驂吾輩慣冰檠世好殊酸鹹君去宰壯縣
栽花興方酣我乃賦歸與悔狂口宜緘棘蠅來營營關
虎卧耽耽頽波從汨沒砥柱高巉巖

孤士脫選階如出百丈塹舉員必及格桂籍始一占宰
邑非不榮吏塵豈宜厭平生學愛心小試乃可驗今時
邑大夫不軫閭閻念非財不經營所欲須屬餼勑第要

高華買姬求美艷驕色肆顏顏嚴科行聚斂攫肉比饑
鷹噬膚如獐獫但規已豐腴皇恤民亡咎吁嗟饕餮徒
信是搢紳黍中人易轉移習俗多薰染林君最高明百
行無一欠俗然君不然白璧絕瑕玷狂生作此詩未病
投鍼砭愛助極拳拳苦語忘其僭

寄林教授龜從

我生麋鹿羣巖穴性所樂寓城看病女蹤跡良蹉跎神
明倘見憐醫藥須課效便當歸舊廬誰愛入此鬧炎暑

甚蒸炮矮屋如籠罩欠伸尺蠖形低垂木雞貌清晨得
君書銜繫新州教慈恩叙同年轉盼夢一覺我於端平
初蓬山叨直僦批鱗拂神龍編鬚犯關豹一斥禘三官
連年絕廩稍我罪坐狂愚令受人繫敲君胡二十年無
由極比較今又深入南正坐不能巧羣兒益紛拏疾足
逞超趕我輩履羊腸所歷極确磽宦海走千帆好風縱
篙棹我輩航一葦無緣出泥淖世道日以艱大厦摧棟
橈邊塵日以紛衝梯設矢砲逆潮陸成淵苦旱水飛窖

餓莩盈途，途驕兒縱烈，爆君視此何時有。官如荷校，猶戒我韜藏前，尤勿再傲良玉，不受焚直木，不畏撓命當安窮。通義當守忠孝，久別誦吾詩，君心獨無忤。

跋林學士宋卿帖

林初第時與友人洪明昌帖云：某叨忝後得鋪地錢千省，孤寒出京人例，厚贖之所存無幾，但沒雙金閑費耳。僕一日過姑丈林叔寶家，睹此帖因嘆前輩高誼如此，偶憶韓魏公生平輕財喜士，凡數

事國史不載而家傳載之遂成古詩以發潛德

朝爲一旅人暮拾九品官趾高氣且浮反面視孤寒昔
聞韓魏公義風塞人寰赤烏坐畫錦有客排其關孤身
無所賚乞公玉盥盤公笑授之去感涕雙泫瀾我始得
此事謂可聳俗觀家傳書甚悉國史載不完今見學士
帖爛然銀鈎蟠方其一第初半載游長安持書遺鄉朋
客費無虛閑近得奩中貲分壯貧士顏寧我食無魚不
忍渠無餐寧我裾無華不忍渠衣單臭味何所愛敢言

囊之慳猶愈輕薄兒一笑黃金拚我來閱遺書據案發
長歎縱橫纔片紙突兀已萬間魏公為上相庇士易為
懼林公初筮仕為此良獨難景仰前輩人高節騫雲山
原下不可作清風何時還泚筆哦此詩寄名烏絲欄庶
幾一見者可以激偷頑

反艷歌曲復三山林斗南

誰作艷歌曲律清語不塵雜之古樂府意態甚迫真謂
余欠嫵媚宜為衆女嗔方憐長門閉漸喜湯沐新此曲

豈不俊所儼非吾倫生爲奇男子先辨許國身有手要
折檻不炙許史門有頭要叩墀不拜五侯塵昵昵兒女
語煦煦婦人仁夕泣緣失寵朝欣爲承恩此非奴事張
定是妾效秦是爲赤有臭何止黃不純因君詞婉美感
我意酸辛正恐漆園女唾點我輩人

送地粟與囊山應叟和尚

淤泥生蓮花不如生地粟蓮花生好看地粟却好喫看
底只是虛喫底却是實虛實總不如般若波羅密

新
強
山
廣
開
廣